

金石錄



金石錄卷第十四

漢陽朔塲字

漢居攝墳壇刻石二

漢巴官鐵量銘

漢會稽東部都尉路君闕銘

漢南武陽功曹闕銘

漢王稚子闕銘

漢謁者景君表

漢謁者景君碑陰

漢郟令景君闕銘

跋尾四  
漢

金石錄  
卷二四  
漢麟鳳贊并記

漢國三老表君碑

漢西嶽石闕銘

漢張平子碑

漢張平子殘碑

漢北海相景君碑

漢北海相景君碑陰

漢敦煌長史武班碑

漢武氏石闕銘

漢費亭侯曹騰碑

漢司隸楊厥開石門頌

漢吳郡丞武開明碑

漢祀長嚴訢碑

漢從事武梁碑

漢平都侯相蔣君碑

漢陽朔博字

右漢陽朔博字云尉府壺壁陽朔四年正朔始造設已所  
行字畫奇古西漢文字世不多有此字完好可喜然所謂  
尉府壺壁又云已所行者莫曉其為何等語

漢居攝壇刻石二

右居攝壇壇刻石二其一云上谷府卿墳壇其一云祝其  
卿墳壇皆居攝二年三月造上谷郡名祝其縣名不知所  
謂府卿與縣卿為何官蓋自王莽居攝官名日易故史家  
不能盡紀也其曰墳壇者古未有土木像故為壇以祀之  
兩漢時皆如此

漢巴官鐵量銘

此盆色類丹砂魯直石刻云其  
一日秦刀巴官三百五十戊永

平七年第二十七  
西余始興康午歲  
親見之今在巫山縣治韓暉仲云

右漢巴官鐵量銘云巴官永平七年三百五斤第二十七  
前代以永平紀年者凡五漢明帝晉惠帝後魏宣武李密  
偽蜀王建惟明帝至十八年其他皆無及七年者以此知

為明帝時物也此銘王無兢見遺

漢會稽郡東部都尉路君闕銘

右漢路君闕銘二其一云會稽東部都尉路君闕永平八年四月十四日庚申造其一云君故豫州刺史温令云城令公車司馬令開陽令謁者議郎徵試博士路君不知為何人按漢書志建武六年省諸郡都尉唯邊郡往三有之豈會稽邊海故置以官欵又任延嘗為會稽西部都尉而此云東部疑當時會稽分東西部各置都尉史不載尔

漢南武陽功曹闕銘

右漢南武陽功曹墓闕銘云南武陽功曹卿嗇夫又云以

為國三老又云章和元年其它族系名字皆摩滅不可考究  
墓在今沂州有兩闕其一銘元和中立文字尤殘缺難讀

漢王稚子闕銘

右漢王稚子闕銘二其一云漢故先靈侍御史河內縣令  
王君稚子闕其一云漢故兗州刺史洛陽令王君稚子之  
闕按范曄後漢書循吏傳王渙字稚子嘗為温令而刻石  
為河內令者蓋史之誤渙以元興元年卒然則闕銘蓋和  
帝時所立也

漢謁者景君表

右漢謁者景君表其額題漢故謁者景君墓表而其文云



惟元初元年五月丁卯故謁者任城景君卒其他文字磨滅時可讀處皆斷續不復成文矣元初安帝時年號也此在漢時石刻中殘缺為甚特以安帝以前碑碣存者無幾不可棄也故錄之

漢謁者景君碑陰

右漢謁者景君碑陰其前題云諸生服義者又云義士北海劇張敏字公輔弟子濟北荏平竄尊字伯尊凡十五人皆完好可讀云

漢剡令景君闕銘

右漢剡令景君闕銘云維元初四年三月丙戌剡令景君

卒又云君存時恬然無欲樂道安貧信而好古非法不言  
治歐陽尚書傳祖父河南尹父步兵校尉業門徒上錄三  
千餘人又云三司聘請流化下邳又云司空太常博士並  
舉高經君其為元假涂邾城姦邪洗心又云被病喪身歸  
于幽冥門人服義百有餘人按漢人為景君刻銘本欲傳  
于不朽而不著其族系名字何哉

漢麟鳳贊并記

右漢麟鳳贊其上刻麟鳳像各為贊附于下又別有記云  
永建元年秋七月七字筆畫類十字蓋石本殘缺山陽太  
難辨秋無十月當讀為七也守河內孫君新刻瑞像麟鳳最後有銘：凡五句：九字

按漢史安帝時頻有鳳凰麒麟之瑞而順帝永建中則無之不知孫君刻此碑何謂也

漢國三老袁君碑

右漢國三老袁君碑按元和姓纂云袁幹封貴鄉侯始居陳郡為著姓八代孫良生昌璋昌生安璋生洵為司徒唐書宰相世系云袁生玄孫幹封貴鄉侯八世孫良二子昌璋昌成武令生安璋生洵以此碑及後漢書攷之姓纂與唐表殊非踈謬袁安列傳云安祖父良平帝時舉明經為太子舍人建武中至城武令今據此碑良以永建六年卒相距蓋百餘年以此知非一人無疑又安以永平四年薨

良之卒乃在其後三十九年以此知非安之祖亦無疑也  
蓋安汝南汝陽人滂乃陳郡扶樂人其鄉里族系亦自不  
同而安與滂相去歲月甚遠不得為從父兄弟明矣豈二  
人之祖其名偶同遂爾差謬耶又此碑與李利涉編古命  
氏皆云良幹五世孫而姓纂唐史皆以為八代孫碑云幹  
袁生之曾孫而唐史以為玄孫諸書皆云幹以討公孫勇  
功封貴鄉侯而碑獨作公先勇又云封閩內侯食遺鄉六  
百戶者皆莫可考安列傳稱祖良為成武令而唐史謂昌  
為以官者疑唐史之誤也又酈道元水經注扶溝城北有  
索梁碑云梁陳國扶樂人事與碑合唯水經誤以良為梁

尔袁氏自漢以來世為著姓安与滂皆一時顯人而諸書于其族系錯謬如此以此知典籍所載其失可勝道哉

漢西嶽石闕銘

右漢西嶽石闕銘云永和元年五月癸丑朔六日戊午弘農太守常山元氏張勳為西嶽華山作石闕高二丈二赤其後為韻語文詞頗怪又字多假借時有難曉處永和漢順晉穆帝姚泓皆有此號穆帝時華陰不屬晉以此碑驗之恐非姚泓時蓋漢刻也又按晉書載記姚興与泓傳本朝宋莒公紀年通譜皆云泓以義熙十二年即偽位改元永和獨帝紀作十一年未知孰是因考永和年號并記之

漢張平子碑

右漢張平子碑按後漢書列傳云平子永元中舉孝廉連辟公府不就安帝雅聞衡善術學公車特徵拜郎中而碑乃云舉孝廉為尚書侍郎傳云再遷為太史令而碑乃一遷碑云遷公車司馬令遂相河間而傳不載其為公車司馬令傳曰在河間三年上書乞骸骨徵拜尚書乃卒而碑不載其為尚書此數事皆當以碑為據唯傳曰順帝初再徵為太史令其事見平子所為應間可信不疑而碑無之豈平子初嘗罷免後復拜其官而碑不書歟

漢張平子殘碑

右漢張平子殘碑政和中亡友劉斯立以本見寄云其石新得于南陽凡七十有二字今世所傳平子碑有兩本其一亡其首其一亡其尾以二本相補其文乃足此碑蓋後段之亡失者也字畫尤完好云

漢北海相景君碑

右漢北海相景君碑在濟州任城縣景氏在漢世為任城人今有三碑尚存余皆得之此碑家完

漢北海相景君碑陰

右漢景君碑陰按後漢書百官志注河南尹官屬有循行一百三十人而晉書職官志州縣吏皆有循行今此碑陰

載故吏都昌台丘暹而下十九人皆作脩行他漢及晉碑數有之亦与此碑陰所書同豈循脩字畫相類遂致訛謬耶碑陰又有故午營陵是遷等六人姓名莫知其為何官又台丘不見于姓氏書惟見于此者兩人云

漢敦煌長史武班碑

右漢敦煌長史武班碑歐陽公集古錄云漢班碑者蓋其字畫殘滅不復成文其氏族官闕卒葬皆不可見其可見者君諱班尔今以余家所藏本考之文字雖漫滅然猶歷歷可辨其額題云漢故敦煌長史武君之碑知其姓武而官為敦煌長史也碑云武君諱班字宣張音殷王武丁克伐



鬼方元功章炳勳藏王府官族析分因以為氏知其名字  
與氏族所出也又云永嘉元年卒知其卒之年月也

漢武氏石闕銘

右漢武氏石闕銘云建和元年太歲在丁亥三月庚戌朔  
四日癸丑孝子武始公弟綏宗景興開明使石工孟季  
弟卯造此闕直錢十五萬孫宗作師子直四萬開明子宣  
張任濟陰年二十五曹府君察舉孝廉除敦煌長史被病  
云歿苗秀不遂嗚呼哀哉士女痛傷武氏有數墓在任城  
開明者仕為吳郡府丞綏宗名梁仕為郡從事宣張名班  
皆自有碑

漢費亭侯曹騰碑

右漢費亭侯曹騰碑云維建和元年七月二十二日己巳  
皇太后曰其遣費亭侯之國為漢輔藩而歐陽公集古錄  
乃言皇帝若曰其遣費亭侯之國誤也按後漢書建和元  
和桓帝即位梁太后臨朝稱制蓋此碑所載遣騰之國詔  
書乃梁太后非桓帝也東漢自安順以來閹豎尊寵用事  
往々封侯賞顯其後騰之孫操及其曾孫丕再世數十年  
憑藉勢力卒移漢祚而有之以此觀之閹豎用事之禍可  
勝言哉

漢司隸楊厥開石門頌

右漢司隸楊厥開石門頌余嘗讀范曄後漢書鄧騭傳有云時遭元二之災人士飢荒章懷太子注以為元二即元元也古書字當再讀者即于上字下為小二字後人不曉遂讀為元二或同之陽九或附之百六良由不悟致斯乖舛今岐州石鼓銘凡重言者皆為二字明驗也其說甚辨學者信之今此碑有云中遭元二西戎虐殘橋梁斷絕若讀為元元則為不成文理疑當時自有此語漢書注未必然也

漢吳郡丞武開明碑

右漢吳郡丞武開明碑云君字開明而其名已殘缺又云

永和二年舉孝廉除郎謁者漢安二年遷大長秋丞長樂  
太僕丞永嘉元年喪母去官復拜郎中除吳郡府丞壽五  
十七建和二年十一月十六日遭疾卒其可見者如此其  
他摩滅不能盡讀按後漢書志大長秋丞一人秩六百石  
本注官者又長樂少府位在長秋上及職吏皆官者又有  
太僕二千石在少府上丞六百石據志所載中宮及長樂  
宮官屬皆以官者為之而以史傳及漢魏石刻參考如大  
長秋少府之類皆雜用士人今武君以孝廉為郎謁者郎  
中吳郡府丞皆非官者之職然則兩宮官屬蓋亦雜用士  
人也

漢祝長嚴訢碑

右漢祝長嚴訢碑政和中下邳縣民耕地得之碑云惟漢  
中興卯金休烈和平元年歲治東宮星屬角房月建朱鳥  
中宮之均萬物慈射華澤青葱跂行蠕動咸守厥常人物  
同授獨遭災霜顛實祖落壽不寬弘經設三命君獲其央  
年六十九又云伊歎嚴君諱訢字少通兆自楚莊祖考相  
承招命道術治嚴氏春秋馮君章句又云幼為郡掾史會  
稽諸暨尉烏程毗陵餘暨章安山陰長以病去官後為丹  
陽陵陽丞守春穀長舉孝廉遷東牟侯相下邳祝長典牧  
十城所在若神其後有銘、為五言頗殘缺難讀云

漢從事武梁碑

右漢從事武梁碑云故從事武掾掾諱梁字綏宗掾體德忠孝岐嶷有異治韓詩闕幘傳講兼通河洛諸子傳記又云州郡請召辟疾不就安衡門之陋樂朝間之義又云年七十四元嘉元年季夏三日遭疾隕靈其後有銘云懿德玄通幽呂明兮隱居靖處休曜章兮樂道忽榮垂蘭芳兮身沒名存傳無疆兮其他刻畫皆完可讀文多不盡錄碑在濟之任城中宗余寧初嘗得此碑愛其完好後十餘年再得此本則缺其家後四字矣

漢平都侯相蔣君碑

右漢平都侯相蔣君碑文字殘缺其名字官闕皆不可考  
惟其額題漢故平都侯相蔣君之碑而碑云年六十有五  
元嘉二年三月甲午卒還有劉季孫景文者知名士与余  
先公有舊家藏金石刻千餘卷既沒其子不能保為一武  
人購得之其後余故人王侑定觀復得數百卷其中漢碑  
數本余所未有者悉以見贈以其一也

金石錄卷第十四





金石錄卷第十五

跋尾五漢

漢孔子廟置卒史碑

漢東海相桓君海廟碑

漢孔君碣

漢朝明府孔子廟碑

漢吉成侯州輔碑

漢州輔碑陰

漢州輔墓石獸膊字

漢郎中鄭君碑

漢丹陽太守郭旻碑

漢議郎元賓碑

漢孫叔敖碑陰

漢封丘令王元賞碑

漢王元賞碑陰

漢冀州刺史王純碑

漢王純碑陰

漢蒼頡廟人名

漢成皋令任伯嗣碑

漢任伯嗣碑陰

漢平輿令薛君碑

漢泰山都尉孔宙碑

漢孔宙碑陰

漢西嶽華山廟碑

漢老子銘

漢荊州刺史度尚碑

漢孔子廟置卒史碑

右漢孔子廟置卒史碑其前有司徒吳雄司空趙戒奏章

歐陽文忠公具載于集古錄其後又有魯相奏記司徒司

空府文字尤為完好云永興元年六月甲辰朔十八日辛

酉魯相平行長史事卞守長擅叩頭死罪敢言之司徒司

空府壬寅詔書為孔子廟置百石卒史一人掌主祀器選年四十以上經通一藝雜試能奉弘先聖之禮為宗所歸者平叩頭死罪。謹按文書守文學掾魯孔龢師孔憲戶曹史孔覽等雜試龢修春秋嚴氏經通高第事親至孝能奉先聖之禮為宗所歸除龢補名狀如牒平惶恐叩頭死罪。上司空府其詞彬彬可喜故備錄之且以見漢時都國奏記公府其體如此也按華陽國志後漢書志皆云趙戒字志伯而以碑乃作意伯疑其避桓帝諱故改焉

漢東海相桓君海廟碑

右漢東海相桓君海廟碑云唯永壽元年春正月有漢東

海相桓君又云熹平元年夏四月東海相山陽滿君其餘  
文字完者尚多大略記脩飾祠宇事而其銘詩有云浩  
蒼海百川之宗知其為海廟碑也桓君與滿君皆不著其  
名莫知為何人碑今在海州

漢孔君碣

右漢孔君碣在孔子墓林中其額題孔君之墓文已殘缺  
其前云元年乙未而元年上闕二字按東漢自建武以後  
惟桓帝永壽元年歲次乙未其他有三乙未皆非元年然  
則此碣所闕二字當為永壽也

漢韓明府孔子廟碑

右漢韓明府孔子廟碑其畧云君造立礼器樂之音符鍾  
磬瑟鼓雷洗觴觶爵鹿祖桓遵杉禁毒修飾宅廟更造二  
輿所謂鹿者禮圖不載莫知為何器又據字書杉木皮可  
為索喜陳樂也亦非器名皆不可曉故并著其語以俟知  
者

余後見汶陽陳氏所藏古彝為伏鹿之形近歲青州  
獲一器亦全為鹿形疑所謂鹿者因其形而名之尔

### 漢吉成侯州輔碑

右漢吉成侯州輔碑名字已殘缺其額題云漢故中常侍  
長樂太僕吉成侯州君之銘輔名姓見范曄後漢書宦者  
傳以定策立桓帝与曹騰等七人同時封為亭侯今此碑  
載當時詔書有云其封輔為葉吉成侯以此知其名輔而

鄱道元水經注云滄水南有漢中長侍長樂太僕吉成侯  
州苞冢：前有碑其詞云六帝四后是謔是詠今驗其銘  
文實有以語獨以輔為苞蓋水經之誤當取漢史及此碑  
為正

### 漢州輔碑陰

右漢州輔碑陰京兆尹延篤叔堅而下題名者凡四十餘  
人自東漢以後一時名卿賢大夫死而立碑則門生故吏  
往：寓名其陰蓋欲附託以傳不朽爾今輔一宦者而碑  
陰列名者數十人雖當代顯人如延叔堅亦預焉有以見  
權勢之盛如以雖然區區掛名于此者亦可耻也夫

漢州輔墓石獸膊字

右漢州輔墓石獸膊字鄴道元注水經云州君墓有兩石獸已淪沒人有掘出一獸猶不全破甚高壯頭去地丈許制作甚工左膊上刻作辟邪字余初得州君墓碑又覽水經所載意此字猶存會故人董之明守官汝潁間因託訪求之踰年持以見寄其一辟邪道元所見也其一乃天祿字差大皆完好可喜之明又云天祿近歲為村民所毀辟邪雖存然字畫已殘缺難辨其蓋十年前邑人所藏今不可復得矣

漢郎中鄭君碑



右漢郎中鄭君碑實誼過秦論云九國之師遁巡而不敢  
進顏師古曰遁音千旬反流俗書本巡字誤作逃讀者因  
之而為遁逃之義潘岳西征賦云遁逃以奔竄斯亦誤矣  
今此碑有云推賢達善遂遁退讓詳其文意亦是遂巡之  
義然二字決非一音蓋古人用字與後世頗異又多假借  
故時有難曉處不知顏氏何所據遂音遁為遂乎

漢丹陽太守郭旻碑

右漢丹陽太守鄔旻碑云君諱旻字巨公有周之裔也又  
云治律小杜幼仕州郡察孝廉除郎中謁者遷敬陵園令  
廷尉左平治書侍御史獄刑無頗憲臺如砥以父憂去官

還拜郎中侍御史遭母憂服除復拜郎中治書侍御史遷  
冀州刺史徵拜尚書是時淮夷蠹迪帝疇官綏策書褒勵  
俾守丹陽為政四年以公事去官年過耳順寢疾瘖頽延  
熹元年十月戊戌卒其十二月丙申葬微言絕矣諸子曷  
仰三載禮闋迺群相与刻石勒銘家後云昔君即世雖立  
碑頌裁足載字加有瑕下闕君之弟故太尉薨歸葬舊陵  
于是從子故五原太守鴻議即果及循孫某其名殘缺懷祖之  
德乃更刻石不改舊文蓋用昭明祖勳焉郭氏為陽翟著  
姓自躬以來世以通法律顯名於碑所謂太尉公者禧也

漢議郎元賓碑

右漢議郎元賓碑者在今亳州姓名已殘缺所可見者云  
字元賓魯相之孫又云舉孝廉除倉龍司馬衛尉察尤異  
遷吳令視事二稔民用寧康州辟從事公車徵拜議郎年  
四十八延熹二年二月卒使者臨弔賻贈特加其餘文字  
完好者尚多惜其名氏皆亡也

漢孫叔敖碑陰

右漢孫叔敖碑陰云延熹二年中夏之節政在封表期思  
長光視事一紀訪問國中耆年素聞孫君楚時良輔又云  
博采遺苗曾玄孫子考龜吉辰五月癸卯宜以存廢可立  
碑祀招請諸孫都會國右郭西道北處所顯好興上宰祭

倡優鼓舞又云相君有三嗣長子即封食邑固始少子在  
江陵中子居三下一字  
磨滅又云相君卒後十有餘世有渤海  
太守其後歷叙子孫名字甚詳而文字斷續不可次第按  
期思長光碑陰不載姓氏叔敖碑雖有之然已殘缺矣漢  
時令長有在官一紀不遷者乃知前世官吏重于移易如  
此不惟吏民免送迎之擾而士人亦皆安于其職無僥倖  
苟進之心與後世異矣

漢封丘令王元賞碑

右漢封丘令王君碑其姓名已殘缺所可見者字元賞而  
已云察舉孝廉即謁者考工宛陵葉封丘令而銘文亦有

撫臨三國之語歐陽公集古錄云為菟陵丞者蓋誤以葉字為丞尔

漢王元賞碑陰

右漢王元賞碑陰載門生姓名有云右奔喪右斬杖三年余嘗謂聖人之制禮為可繼也無過與不及之弊務合于中庸而已禮曰事師無犯無隱服勤至死心喪三年孔子之喪門人疑所服子貢曰昔者夫子之喪顏淵若喪子而無服喪子路亦然請喪夫子若喪父而無服彼漢人為王君乃為斬衰之服于禮無乃過乎

漢冀州刺史王純碑

右漢冀州刺史王純碑延熹四年立桑欽水經云濟水北  
逕須句城西酈道元注濟水西有安民山山西有漢冀州  
刺史王紛碑漢中平四年立按地里書須胸即今中都縣  
北碑在中都又其官与姓氏皆合疑其是也然以純為紛  
以延熹為中平則疑水經之誤

漢王純碑陰

右漢王純碑陰其前題門生人名自東平馮定伯而下文  
字完好可識者百九十餘人摩滅不可識者又九十餘人  
字畫淳勁可喜其後題義士名云各發聖心共出義錢埤  
碑石直刊紀姓名埤當讀為裨助之裨漢時墓碑多其

門生故吏所立往々各紀姓名于碑陰或載所出錢數其  
非門生故吏而出錢者謂之義士今漢人為王君出錢造  
碑而云各發聖心可謂陋矣

漢蒼頡廡人名

右漢蒼頡廡人名歐陽公集古錄云此碑有蓮勺左鄉有  
秩池陽左鄉有秩池陽集水有秩皆不知是何名號又有  
夏陽長<sup>侯</sup>秩<sup>侯</sup>長則是縣吏之名其字畫不甚精又無事  
實可考姑疑其名號以俟知者爾按前漢書張敞以鄉有  
秩補太守卒史後漢書百官志鄉置有秩三老游徼本注  
曰有秩郡所署秩百石掌一鄉人注引漢官曰鄉戶五千

則置有秩風俗通曰秩則田間大夫言其官裁有秩爾然則有秩蓋亦御史名也

漢成臯令任伯嗣碑

右漢成臯令任伯嗣碑其首已殘缺其可見者云字伯嗣南郡編人也其先蓋任座之苗裔由南又云舉孝廉除郎中蜀郡府丞江州令以服去官為筑陽侯相延熹五年遷來臨縣其後歷叙政績又云遷君桂陽軍後云都邑諡詠甄勒勳績永昭于後碑在今汜水縣汜水在漢為成臯此碑蓋成臯令德政頌爾後漢書桓帝紀延熹八年有桂陽太守任循以此碑校之歲月相符又名与字協知其名循也



漢任伯嗣碑陰

右漢任伯嗣碑陰大觀初獲此碑寘于汜水輦運司解舍壁間余聞其陰有字因託人諷邑官破壁出之遂得此本蓋漢碑有陰者十七八世多棄而不錄爾

漢平輿令薛君碑

右漢平輿令薛君碑文字完好云惟延熹六年春二月平輿令薛君卒烏虜哀哉吏民其咨咨君之德延建碑石于墓之側其後有銘三百餘言叙述甚詳惟不載其名字世系故莫得而考焉

漢泰山都尉孔宙碑

右漢泰山都尉孔宙碑宙北海父也見後漢書融列傳  
又據桓帝紀泰山都尉元壽元年置延熹八年罷宙以延  
熹四年卒蓋卒後四年官遂廢矣

漢孔宙碑陰

右漢孔宙碑陰門生有鉅鹿廣宗捕巡字升臺按氏族書  
如姓苑姓纂皆無捕姓獨見于此碑爾

漢西嶽華山廟碑

右漢西嶽華山廟碑其略云孝武皇帝修封禪之禮巡省  
五嶽立宮其下宮曰集靈宮殿曰存仙殿門曰望仙門歐  
陽公集古錄云所謂集靈者他書不見惟見于此碑爾余

按班固漢書地理志華陰有集靈宮武帝起而酈道元注  
水經亦云敷水北逕集靈宮引地理志所載其語皆同然  
則不獨見于此碑矣而所謂存仙殿望仙門者諸書不載

漢老子銘

右漢老子銘舊傳蔡邕文并書蓋杜甫李潮小篆八分歌  
有曰苦縣光和尚骨立書貴瘦硬方通神世云以碑是也  
今驗其詞乃邊韶延熹八年作非光和中所立未知甫所  
見是以碑否而本朝周越書苑遂以為韶撰文而邕書初  
無所據碑言孔子學禮時計其年紀聃以二百餘歲聃然  
老旄之貌也而史記言謚曰聃按古謚法無聃字又碑云

孔子以周靈王二十年生今以年表及世家考之孔子以魯襄公二十二年生實靈王二十一年未知孰是史書周太史儋事云孔子死後二百二十九年徐廣注曰實二十九年今此碑所書正與史合不知徐廣何所據也

漢荊州刺史度尚碑

右漢度尚碑其首題曰漢故荊州刺史度侯之碑云其先出自顓頊與楚同姓熊下缺之後又曰統國法度其下殘缺不可辨按元和姓纂度姓但云古掌度之官因以命氏不言其與楚同姓也又范曄後漢書列傳度尚自右校令擢為荊州刺史破長沙零陵賊以功封右鄉侯遷桂陽太

守徵還京師以中郎將破賊胡蘭等復為荊州刺史後為  
遼東太守卒于官今以碑考之云封右鄉侯遷遼東太守  
拜中郎將復拜荊州刺史以故秩居蓋未嘗為桂陽太守而  
曰卒于遼東者皆史之誤余每得前代名臣碑板以校史  
傳其官闕歲月少有同者以共知石刻為可寶也

金石錄卷第十五

癸未十二月廿二日抄



金... 錄... 卷十五

...



... 錄... 卷十五... 十一



金石錄卷第十六



跋尾六 漢



漢車騎將軍馮緄碑

漢魯相晨謁孔子冢文

漢廣漢縣令王君神道

漢金鄉守長侯君碑

漢柳孝廉碑

漢衛尉尉卿衡方碑

漢沛相楊君碑

漢淳于長夏丞碑

漢郎中馬君碑

漢武都太守李翁碑

漢博陵太守孔彪碑

漢成陽靈臺碑

漢廷尉仲定碑

漢故民吳公碑

漢司隸校尉魯峻碑

漢桂陽太守周府君頌

漢周府君碑陰

漢石徑遺字

漢堂谿典嵩高山石闕銘



漢武六





漢帝克碑

漢蒼頡廟碑

漢序彰長斷碑

漢車騎將軍馮緄碑

右漢車騎將軍馮緄碑以范曄後漢書考之史云字鴻卿而碑云皇卿史云初舉孝廉七遷至廣漢屬國都尉拜御史中丞順帝末持節揚州諸軍事與中郎將滕撫擊破群賊今據碑自舉孝廉至為廣漢屬國都尉凡十一遷而為中丞與督使徐揚二州討賊皆在為都尉前碑云討賊時坐迫州縣正法而史不載又云為隴西太守坐問吏辜旬

不分去官以羗駭動為四府所表復家拜隴西太守而史  
 但言遷隴西太守尔史云為遼東太守徵拜京兆尹轉司  
 隸校尉遷廷尉太常拜車騎將軍以碑考之混為遼東太  
 守以前嘗復為治書侍御史遷尚書遂為廷尉未嘗拜京  
 兆尹及司隸也史云振旅還京師監軍使者張敞承宦者  
 白奏混會長沙賊復起攻桂陽武陵混以軍還盜賊復發  
 榮免而碑云臨當受封以謠言奏河内太守中常侍左悺  
 弟坐遜位史復拜廷尉時山陽太守單遷以罪繫獄混考  
 致其死遷故車騎將軍超之弟中官相黨遂共誹章誣混  
 坐輸左校而碑云表荊州刺史李隗南陽太守成晉

晉漢史  
作縉

太原太守劉瑱不宜以重論坐正法作左校亦皆不合史  
又云為河南尹時上言舊典中官子弟不得為牧人職帝  
不納拜屯騎將軍復為廷尉卒于官而碑云復廷尉奏中  
官子弟不宜典牧州郡獲過左右遜位永康元年薨亦當  
以碑為正碑又云錕謚曰桓而史亦不載余嘗謂石刻當  
時所書其名字官爵不應差誤可信無疑至于善惡大節  
則當以史氏為據今必傳首尾顛倒錯謬如<sup>則</sup>然史之所  
載是非褒貶失其實者多矣果可盡信邪

漢魯相晨謁孔子冢文

右漢魯相晨謁孔子冢文已断裂闕其上一段其畧可見

金石錄 卷一  
三  
者云建寧元年三月十八日丙申晨又云其四月十一日  
戊子到官謁孔子冢其他文字雖完皆不可次第魯相晨  
有兩碑皆在孔子廟中其一碑云臣蒙恩受任符守得在  
奎婁周孔舊寓又云臣以建寧元年到官其一碑云魯相河  
南史君諱晨字伯時從越騎校尉拜以建寧元年四月十  
一日戊子到官然則斯碑所載名晨者蓋魯相史晨也

漢廣漢縣令王君神道

右漢廣漢縣令王君神道建寧元年十月造縣令字作苓  
漢人淳質文字相近者多假借用之如縣令字人所常用  
而尚假借何邪

漢金鄉守長侯君碑

右漢金鄉守長侯君碑載其上世云漢興侯公納榮濟太  
上皇于鴻溝之阨謚曰安國君曾孫酺封明統侯光武中  
興立孫霸為臨淮太守擁兵從光武平定天下轉拜執法  
刺姦五威司命大司徒公封於陵侯歐陽公集古錄云執  
法左右刺姦五威司命皆王莽時官侯霸列傳云霸莽時  
為隨令遷執法刺姦而未嘗為五威司命後代伏湛為大  
司徒封關內侯既薨光武下詔追封則卿侯而此碑言封  
於陵侯未知孰是據碑言刺姦司命為光武時官蓋碑之  
謬余按霸列傳霸薨追封則卿侯至子昱改封於陵而遂

以霸為於陵侯疑心碑之誤又按高祖紀侯公說項羽歸  
太公呂后乃封侯公為平國君今此碑言安國既不同而  
平國君乃生時稱號如婁敬為奉春君之類碑以為謚恐  
亦非是又酺封明統侯漢書功臣表心不載不知碑何所  
據也

漢柳孝廉碑

右漢柳孝廉碑云君諱敏其先蓋五行星

下缺一字

二十八舍

柳宿之精也其說亦可謂恠矣自戰國以來聖人不作諸  
子百家異端怪說紛然而起其弊至東漢而極焉自非豪  
傑之士卓然不為流俗所移未有不從而惑者也若此碑

直以柳君得姓出于柳宿果何所據哉

漢衛尉卿衡方碑

右漢衛尉卿衡方碑有云感昔人之凱風悼蓼儀之劬勞以蓼莪為蓼儀他漢碑多如此蓋漢人各以其學名家故所傳時有異同也

漢沛相楊君碑

右漢沛相楊君碑歐陽公集古錄云碑首尾不完失其名字余按楊震碑沛相名統震長富波戾相牧之子也

漢淳于長夏承碑

右漢淳于長夏承碑云君諱承字仲克東萊府君之孫太

尉掾之中子中右即將弟也累葉牧守印紱典據十有餘人  
皆德任其位名豐其爵是故寵祿傳于歷世榮勳著于王  
室君鍾其美受性淵懿含和履仁治詩尚書兼覽群藝靡  
不尋暢州郡更請屈已匡君為主潯督郵五官掾功曹上  
計掾守令冀州從事又云察孝不行太傅胡公歆其德美  
旌招俯就羔羊在公四府歸高除淳于長又云年五十有  
六建寧三年六月癸巳淹疾卒官碑在今洛州元祐間因  
治河堤得于土壤中建寧靈帝時年號也距今千歲矣而  
刻畫完好如新余家所藏漢碑二百餘卷獨此碑最完

漢郎中馬君碑



右漢郎中馬君碑文字殘缺所可見者字元海而已又云其先賜號馬服因遂氏焉又云以和平元年舉孝廉除郎中謙虛接下冠名三署又云年四十元嘉三年正月卒又云夫人年五十五建寧三年十二月卒其他不可考究矣

漢武都太守李翕碑

漢時文字多與今隸書不合皆依石本錄之

右漢武都太守李翕碑文字首尾完好云漢故武都太守漢陽阿陽李君諱翕字伯都其後歷叙在郡治蹟云郡西狹中道危難阻峻緣崖碑閣兩山壁立隆崇造雲下有不測之谿阨窄促迫財容車騎進不能濟息不得駐數有顛覆隕隧之害君勅衡官有秩李瑾掾仇審因常繇道位鑿

燒破析刻白崔嵬滅高就埤柙致土石堅固廣大可以夜  
涉四方無雍行人懼怖民歌德惠穆如清風乃刊斯石其  
後有頌詩最末題建寧四年六月十三日壬寅造云

漢博陵太守孔彪碑

右漢博陵太守孔彪碑歐陽公集古錄云孔君碑者其名  
字摩滅不可見而世次官牒粗可考云孔子十九代孫穎  
川君之元子也舉孝廉除郎中博昌長拜尚書侍郎治書  
侍御史博陵太守遷下邳相河東太守建寧四年十月卒  
其終始畧可見惟其名字皆亡為可惜也今此碑雖殘缺  
而名字尚完可識云君諱彪字元上又韓府君孔子廟碑

陰載當時出錢人名亦有尚書侍郎孔彪元上与此書正  
同惟孔君自博陵再遷為河東太守而碑額題故博陵太  
守孔府君碑漢人多如此然莫曉其何謂也

漢成陽靈臺碑

右漢成陽靈臺碑成陽屬今雷澤碑略云先母慶都  
僊歿蓋葬于茲欲人不知名曰靈臺歐陽公集古錄以謂  
自史記地志及水經諸書皆無曉母葬處余按班固西漢  
劉昭東漢書地里志皆曰成陽有先冢靈臺而東漢志  
帝元和二年東巡狩將至泰山道使者奉一太牢祠帝  
堯于濟陰成陽靈臺与章帝紀所載正同帝紀章懷太子

注引鄆緣生述征記云成陽縣東南有堯母慶都墓上有祠廟堯母陵俗亦名靈臺文母水經注今成陽城西二里有堯陵南一里有堯母慶都陵于城為西南稱曰靈臺蓋兩漢史所載似以靈臺為堯冢惟此碑與述征記水經迥直指為堯母冢尔然水經云在成陽西南而述征記云在東南未知孰是又集古錄云諸書俗本多作在城陽獨此碑為成陽當以碑為正余嘗考之成陽縣名屬濟陰郡城陽乃王國名漢文帝二年以封齊悼惠子章者漢志所載各異未嘗差誤也碑有廷尉某歐陽公以為姓名摩滅不可讀今驗其缺處姓下隱有定字知其名定而其後云濟

陰太守審晃成陽令管遵各遣大掾輔助仲君知其姓仲  
仲氏世為成陽人定有墓在雷澤碑尚存其額題漢故廷  
尉仲君碑有云表祠唐堯為漢祈福又云為廷尉卿託病  
乞歸修堯靈臺黃屋三十餘上聽拜太中大夫云

余為淄川同官

李堯雷澤人云冢正在城西南蓋述征記誤

### 漢廷尉仲定碑

右漢廷尉仲定碑在今濮州雷澤其額題漢故廷尉仲君  
之碑載官闕甚詳雖殘缺然尚可次第其略云君諱定  
聖漢龍興家于成陽父張掖廣漢太守以父勲拜琅邪太  
守南陽陰府君察孝不行南郡胡公除濟陰復舉孝廉拜

尚書左丞除郎中遷彭城呂長徵試博士太傅下邳趙公  
舉君高行遷豫州刺史將軍從事符節令豫章太守徵議  
郎拜大尚書遜位復徵拜將軍長史遷城門校尉執金吾  
拜太中大夫遷廷尉卿託病乞歸修完靈臺黃屋三十餘  
上聽拜太中大夫臺成事訖上以君先帝舊臣策令州郡  
以禮特遣熹平元年孟秋上旬君遘疾不瘳于是門生養  
徒故吏鄉黨刊石勒銘樹碑表道焉兩漢遷拜次第史既  
不能詳載而石刻類皆摩滅難考今此碑所載詳悉故盡  
著之所謂南郡胡公者廣也太傅下邳趙公者峻也按定  
漢史無傳惟風俗通元和姓纂具載姓名官爵云

漢故民吳公碑

右漢吳公碑其額題故民吳公之碑云熹平元年十二

月上旬吳公仲山其他刻畫完好如新文詞頗拙陋書亦

怪而不工然漢時石刻存者漸少而此碑特完故錄之以

資博覽

漢司隸校尉魯峻碑

右漢司隸校尉魯峻碑云君諱峻字仲嚴郡道元注水經

引戴延之西征記曰焦氏山北金鄉有漢司隸校尉魯恭

冢前有石祠四壁皆青石隱起自書契以來忠臣孝子

貞婦孔子及七十二弟子形像邊皆刻石記之今墓與

石室尚存惟以碑為人輦置任城縣學矣余嘗得石室所  
刻畫像與延之所記合又其他地里書如方輿志寰宇記  
之類皆作峻惟水經誤轉寫為恭尔

漢桂陽太守周府君碑

右漢桂陽太守周府君頌歐陽公集古錄云府君字君光  
而名已訛缺不可辨圖經但云周使君而亦不著其名後  
漢書又無傳遂不知為何人而曾子固言嘗得此碑于知  
韶州王之才之才以書來言曲江縣圖經周府君名昕字  
君光則永叔云圖經不載其名者蓋考之未詳也今此本  
雖訛缺然究其點畫殊不類昕字二公所說既不同而韶



州圖徑余家偶恐有皆未可知也當考之

余後見市中印本歐陽公廬陵

集別本有一跋尾云周君名懔字頗近之

### 漢周府君碑陰

右漢周府君碑陰題名凡三十一人姓氏具存按酈道元注水經瀧水南逕曲江縣東縣昔號曲紅曲紅山名也而東西兩漢史皆作曲江今據此碑自縣長區祉而下凡十七人皆書為曲紅則是當時縣名曲紅無可疑者不知兩漢史皆作曲江何也

### 漢石經遺字

右漢石經遺字者藏洛陽及長安人家蓋靈帝熹平四年

所立其字則蔡邕小字八分書也其後屢經遷徙故散落不存今所有者才數十字皆土壤埋沒之餘摩滅而僅存者尔按後漢書儒林傳叙云為古文篆隸三體者非也蓋邕所書乃八分而三體石經乃魏時所建也又按靈帝紀言詔諸儒正五經文字刻石立于太學門外蔡邕傳乃云奏求正定六經文字既已不同而章懷太子注引洛陽記所載有尚書周易公羊傳論語禮記今余所藏遺字有尚書公羊傳論語又有詩儀禮然則當時所立又不止六經矣洛陽記又云禮記碑上有諫議大夫馬日磾議即蔡邕等名今論語公羊後亦有堂谿典馬日磾等姓名尚在據

邕傳稱邕以經籍去聖久遠文字多謬俗儒穿鑿疑誤後  
學乃奏求正定自書于碑于是後儒晚學咸取焉正今石本  
既已摩滅而歲久轉寫日就訛舛以世所傳經書本校以  
遺字其不同者已數百言又篇第亦時有小異使完本具  
存則其異同可勝數邪尅則豈不可惜也哉而後世學者  
于去古數千百歲之後盡徂前世諸儒之論欲以己之私  
意悉通其說難矣余既錄為三卷又取其文字不同者具  
列于卷末云

漢堂谿典嵩高山石闕銘

右漢堂谿典嵩高山石闕銘云中即將堂谿典伯并熹平

金石錄 卷一  
四年來請兩嵩高廟按後漢書靈帝紀熹平五年復崇高山名為嵩高山章懷太子注引前漢書武帝祀中嶽改嵩高為崇高東觀記曰使中郎將堂谿典請兩因上言改之復為嵩高今以文乃熹平四年可以正漢史之誤又蔡邕傳注引先賢行狀云典字子度而延萬傳注又作季度今以碑乃云字伯并亦當以碑為正

漢帝堯碑

右漢帝堯碑云帝堯者昔世之聖王也其先出自塊隗翼火之精有龍神首出于常羊又云名紀見乎河雒爰嗣八九慶都与赤龍交而生伊堯又云侯伯遊于玄河之上龍

龜負銜投鈴受與然後堯乃受命其說于識律可謂怪妄  
不經矣堯之所以為聖者豈假此而已也哉

漢蒼頡廟碑

右漢蒼頡廟碑文字殘缺其略可辨者有云蒼頡天生德  
于大聖四目靈光為百王作憲而其銘曰穆二聖蒼知為  
蒼頡碑也考其歲月蓋熹平六年立

漢庠彰長漸碑

右漢庠彰長漸碑在華陰已断裂惟存下一段故其姓名  
皆亡矣所可見者有云先高祖時以吏二千石自齊臨淄  
徙充闕中祖字興先為執金吾第廳漁陽太守又云元初

元年遭家不造三歲喪父事母有柴穎之行初仕為縣主簿功曹郡諸曹史帳下司馬劉君招命署議曹掾假除百石遷補任尉假印綬守廣平夏曲陽令斥彰長熹平二年秋七月寢疾不豫最後題熹平六年十月九日辛酉造按史記及漢書本紀高祖九年徙齊楚大族昭屈景懷田五姓關中而其四姓皆楚人自齊徙者唯田氏尔然則此碑所謂高祖時自齊臨淄徙者其人必姓田氏也

從關中然本出于田氏也

斥彰東西漢史皆作斥章

按第五氏亦云自齊

金石錄卷第十六

臘月廿三日黃昏

金石錄卷第十七

跋尾七漢

漢梁相費沆碑

漢堂邑令費君碑

漢費君碑陰

漢太尉陳球碑

漢華岳碑

漢太尉郭禧碑

漢郭禧碑

漢郭禧後碑

漢樊毅西嶽碑

金石錄  
卷一  
漢禹廟碑

漢冀州從事郭君碑

漢逢童碑

漢逢童碑陰

漢三公碑

漢穀阮君神祠碑

漢穀阮君神祠碑陰

漢無極山碑

漢揚州刺史敬君碑

漢臺長蔡湛碑



漢安平相孫根碑

漢涼州刺史魏君碑

漢碭孔君神祠碑

漢梁相費沅碑

右漢梁相費沅碑在湖州其額題漢故梁相費君之碑云梁相

諱沅字仲慮此邦之人也其先季文為魯大夫有封功費

因以為姓秦項兵起避地于此遂留家焉余家所收姓氏

文字粗備以諸書參考頗多抵牾不合姓苑云費氏禹後

漢有長房蜀志有丞相禕又云今琅琊亦有此姓音父位

反季利涉編古命氏云費氏出自魯桓公少子季友有勳

于社稷賜汶陽之田封邑于費子孫氏焉漢有費將軍其  
後有費忠費柔適蜀為寧蜀人忠之孫徙于荊州後遷  
江夏忠十代孫奕孫禕又家于蜀晉平蜀禕之子承復  
歸江夏林寶元和姓纂云費氏云秘史記討李臣費中  
夏禹之後楚有無極漢有直蜀有禕晉有詩又云琅邪費  
氏直之後也陳湘姓林曰費代音蜚夏禹之後余嘗考之此  
字有兩姓音讀不同源流亦異其一音蜚嬴姓出于伯翳  
史記所載費昌費中楚費無極漢費將軍費直費長房蜀  
費禕之徒是其後也其一音秘姬姓出于魯季友姓苑所  
載琅琊費氏而以碑所謂梁相費君是其後也然則姓苑

姓纂姓林皆云夏禹之後姓纂又云亦音秘及謂琅邪費氏為直之後皆其差誤而編古命氏以費將軍費禕之後出于魯季友亦非也余又按春秋僖公賜季友汶陽之田及費而左傳亦以謂季友有功于魯受費以為上卿今以為季友<sup>文</sup>有功封費者蓋碑之誤

漢堂邑令費君碑

右漢堂邑令費君碑云惟熹平六年無射之月堂邑令費君寢疾卒嗚呼哀哉於是夫人元弟卜循追而誄之其後有銘詩碑所述費君事不甚詳悉而其名字世次官秩具載于碑陰今附于後

漢費君碑陰

右漢費君碑陰云君諱鳳字伯簫梁相之元子九江太守  
之長兄也世德襲爵銀艾相亞又云君踐郡右職三貢獻  
計漢安二年吳郡太守東海鄣君以君有委蛇之節自公  
之操年三十一舉孝廉拜郎中除陳國新平長遂宰堂邑  
其後為五字韻語詞頗古雅而時殘缺不可次叙其前  
題君甥家中孫甘陵石勛字子才所述云

漢太尉陳球碑

右漢太尉陳球碑有兩碑皆在下邳其一已殘缺矣以碑  
差完可考前代碑碣與史傳多抵牾而球碑所載官職事

跡與傳合東漢之末政在閹寺威福下移其勢蓋可畏也  
而一時衆君子猶奮不顧身力排其奸雖遭屠戮而不悔  
志雖不就然亦可謂壯哉如球是已使當時士大夫能屈  
己以事之則富貴可長保矣然君子固未肯以彼而易此也

漢華嶽碑

右漢華岳碑集古錄云碑以周禮職方氏為識方氏者疑  
當時周禮之學自如以蓋識誌其義通也余按表逢華岳  
碑亦引職方氏乃用識字蓋漢人簡質字相近者輒假借  
用之初無意義尔

漢太尉鄧禱碑

右漢太尉鄔禧碑文字殘缺所存才百許字其可見者公  
 諱禧字君房而已禧郭躬從孫也其事跡附見躬傳云少  
 明習家業兼好儒學有名譽延熹中為廷尉建寧二年代  
 劉寵為太尉而靈帝紀亦云是年十一月禧為太尉章懷  
 太子注云字公房扶溝人也郭氏世為陽翟人自躬以下  
 皆葬陽翟其墓尚存今此碑缺處猶有陳留扶溝字疑禧  
 嘗寓居是邑其卒也返葬故鄉而漢書注遂以為扶溝人  
 恐誤

漢鄔禧碑陰

右漢鄔禧碑陰其首有四大字云故吏人名其下列故吏

密張立度成區師張協子通雒陽李蒼子考故民河南陰  
德紀信以下凡百餘人又有右河南右河內郡右弘農郡  
右扶風字字畫完好者甚多筆法淳古可愛

漢鄔禧後碑

右漢鄔禧後碑殘缺尤甚其畧可辨者云惟光和二年夏  
五月甲寅太中大夫故太尉鄔公薨又云公之循子故五  
原太守餘不復成文而其額題漢故太尉鄔公神道字畫  
尚完云後漢書列傳既不載禧而終而靈帝紀但云建寧  
三年夏四月太尉鄔禧罷亦不言其為何官今以碑考之  
乃知其罷為太中大夫而卒于光和二年也五原太守名

鴻後為司隸校尉封成安鄉侯

漢樊毅西岳碑

右樊毅西岳廟碑云弘農太守河南樊君諱毅潁陽文忠  
公集古錄云據此碑乃即時所立而太守生稱諱者何哉  
按春秋左氏傳周人以諱事神君名終將諱之而祀卒哭  
乃諱鄭氏以謂敬鬼神之名也諱避也生者不相避名衛  
戾名惡大夫有石惡臣君同名春秋不非又漢宣帝元康  
二年詔曰聞古天子之名難知而易諱也今上書觸諱以  
犯罪者朕甚憐之其更諱詢諸觸諱在令前者赦之蓋卒  
哭而諱其名實始于周而生死皆稱諱西漢已如此矣然



則生曰名死曰諱又出于近世也有以見後世忌諱愈密  
如此然生而稱諱見于石刻者甚衆不獨此碑也

### 漢禹廟碑

右漢禹廟碑云光和二年十二月丙子朔十九日甲子皮  
氏長南陽章陵劉尋孝嗣丞安定烏氏樊璋元孫其後叙  
禹平水土之功而最後有銘文多殘缺不能盡識碑在龍  
門禹廟

### 漢冀州從事郭君碑

右漢鄆君碑文字已殘缺其額題曰冀州從事鄆君之碑  
碑云其先出高辛興自于周缺一蕃虞鄆在河魏之間遭

晉荒疆乃喪厥土亦世孽之職思其勲子孫纓布家于樂  
 土因國為氏又云歷諸曹掾史主簿督郵五官掾功曹又  
 云光和二年終三年十月葬又云哀之考妣追惟實靈下  
 商號吡喪子失明據妣乃父母生而稱考妣也爾雅云父  
 為考母為妣鄭璞注引禮記曰父母妻終曰考妣嬪今世  
 學者從之而璞援據諸書以為非生死之異猶今謂兄為  
 弟妹為媚尔今此碑漢人所為已不用戴氏之說以此知  
 璞為有據然禮經行于世久既有此論事親者所當避也

漢逢童碑

右漢逢童碑刻畫完好云童子諱盛字伯彌薄令之玄孫

遂成君之曾孫安平君之孫五官掾之長子也又云年十有二歲在協洽五月乙巳噓喻不反天墮精晃於是門生東武孫理下密王升等共刊石叙述才美以銘不朽焉其後題光和四年四月五日丁卯立碑舊在濰州昌邑縣近歲移置郡中云

漢逢童碑陰

右漢逢童碑陰題曰右家門生右縣中士大夫凡十三人有督郵廷敏賓廷后升司文叔盛姓字按廷與司文姓氏書皆不載今誌于此

漢三公碑

右漢三公碑歐陽公集古錄有北嶽碑云文字殘缺尤甚  
其可見者曰光和四年以此知為漢碑爾其文多言珪幣  
牲酒黍稷豐穰等事其後二人姓名倘可見云南陽冠軍  
馮巡字季祖甘陵夏方字伯陽余嘗託人于北嶽訪求前  
代刻石或盡獨無漢碑今坎碑所書事及二人姓名與集  
古錄所載皆同又光和四年立惟其額題曰三公之碑而  
集古以為北嶽碑豈歐陽公未嘗見其額乎三公者山名  
其事亦載于白石神君與無極山碑三山皆在真定元氏云

漢穀阮君神祠碑

右漢穀阮君神祠碑歐陽公集古錄云穀阮君祠今謂之

五部神廟其像有石隄西戎樹谷五樓先生東臺御史王  
剪將軍莫曉其義今此碑有云石隄樹谷南通商雒又云  
前世通利吏民興貴有御史大夫將軍牧伯故為立祠以  
報其功乃知石隄樹谷御史將軍之號自漢以來有之流  
俗相傳其所從來遠矣而水經鄭縣城南山北有五部神  
廟：前有碑光和四年鄭縣令河東裴畢字君先立又知  
五部神自齊魏間已有矣猶矣裴君水經以為名畢而集  
古錄云名畢今詳其點畫頗近畢字疑集古錄誤

漢穀阮君神祠碑陰

右漢穀阮君神祠碑陰縣令及鄉人題名其完好可識者

二百餘人摩滅者又百餘人小字淳勁可喜歐陽公集古錄所未嘗有也

漢無極山碑

右漢無極山碑按顏之推家訓曰詩云有滄萋興雲祁毛傳云滄陰雲兒萋雲行兒祁徐也箋云古者陰陽和風雨時其來祁然不暴疾也按滄已是陰雲何勞復云興雲祁邪雲當為雨俗寫誤尔班固靈臺詩云習祥風祁甘雨以其證也據此則本作雲字之推改為雨耳而陸德明經典釋文亦云本作興雲非也蓋德明據顏氏說改之故後來本皆作雨今此碑銘文有曰興雲祁

雨我公田遂及我私乃知漢以前本皆作興雲顏氏說初無所據特私意耳

漢揚州刺史敬使君碑

右漢敬使君碑在河東平陽其額題云漢揚州刺史敬君之銘碑已殘缺其名字皆亡略可辨者嘗辟司隸從事又為治書御史家後云年五十三光和四年閏月遭疾而卒其他不復可考按姓苑載風俗通有敬歆漢末為揚州刺史元和姓纂云歆平陽人而後周書敬珍傳唐書宰相世系表歆皆作韶余後得後魏敬曦造像碑亦作韶乃知姓苑姓纂之謬又集古錄此碑凡再出其一題敬使君碑云

金石錄 卷十七  
九  
名字已摩滅獨首有敬仲字故寓其名尔疑其人姓田也  
其一題無名碑所載事皆同蓋歐陽公未嘗見其額尔

漢藁長蔡湛頌

右漢藁長蔡君頌云君諱湛字子德河內修武人也又云  
舉孝廉辟讓應司徒府除廣川長復郡太尉熹平四年六  
月詔書其下斷缺似是叙述遷藁長及在官政績又云三  
年遷高邑令吏民追思於是故吏粟尹等相與合會立碑  
起頌刊斯石焉其後有銘冢後題光和四年十二月詔書  
遷并州刺史其大略如此其他文字殘缺不可考矣

漢蔡湛碑陰



右漢蔡湛碑陰載出錢人名有故史賤民議民故三老故處士義民其稱故史義民之類他漢碑多有之唯議民賤民獨見于此碑然莫詳其義

漢安平相孫根碑

右漢安平相孫根碑云府君諱根字元石司空公之伯子樂安太守之兄子漢陽太守侍御史之兄乘氏令之考厥先出自有殷玄商之系子湯之苗又云聖武定周封比干之墓循裔分析避地匿軌姓曰孫焉又云遷鄆長雍奴令換元氏考城令諫議大夫拜議郎謁者遷荊州刺史徵拜議郎遷安平相年七十有一光緒四年十二月乙巳卒碑

在今高密縣所謂司空公者桓帝紀永壽三年太常孫朗  
為司空注云朗字代平北海人漢三公名亦云朗北海高  
密人余嘗觀漢時碑碣載其家世皆止書官爵蓋為子孫  
作銘不欲名其父祖尔其家為得體然非當代顯人則遂  
莫知其為何人也又按姓苑姓纂諸書皆云孫氏周文王  
子衛康叔之後衛武公子為衛上卿因氏焉今此碑乃云  
出于商比干之後蓋古人或因賜姓命氏或以官或以字  
或以封或以居或以王父字為氏故姓氏雖同而源流或  
異書傳闕漏不載者多矣

漢涼州刺史魏君碑

右漢涼州刺史魏君碑文字殘缺族系名字皆不可考其  
粗可見者察孝廉除郎中尚書侍郎右丞卒于光和四年  
而其額題涼州刺史魏君碑云

漢碭孔君神祠碑

右漢碭孔君神祠碑其前題漢故行梁相事碭孔君之神  
祠文詞字畫皆古怪而不工又時有難曉處然刻畫甚完  
孔君者名耽字伯本

金石錄卷第十七

二十五日抄是日捕魚獲頗多

...

...

...

...

...

...

...

...

...

...

金石錄卷第十八

跋尾八漢

漢成陽令唐君頌

漢唐君碑陰

漢白石神君碑

漢幽州刺史朱龜碑

漢朱龜碑陰

漢都鄉正街彈碑

漢太尉劉寬碑

漢劉寬碑陰

漢尉氏令鄭君碑

漢趙相劉衡碑

漢陳君碑

漢陳仲弓碑

漢陳仲弓碑陰

漢陳<sup>仲</sup>弓壇碑

漢園令趙君碑

漢周公禮殿記

漢巴郡太守樊君碑

漢綏民校尉熊君碑

漢宗資墓天祿辟邪字



六十八

漢司空宗俱碑

漢馮使君墓闕銘

漢高陽令楊君碑陰

漢浚儀令衡立碑

漢光祿勳劉曜碑

漢成陽令唐君頌

右漢成陽令唐君頌云君諱扶字正南字畫尚完而歐陽公集古錄乃云其名殘缺何哉碑額題漢故成陽令唐君之頌在今濮州雷澤縣古成陽也

漢唐君碑陰

右漢唐君碑陰載出錢造碑人有故從事故督郵故史處士門生門童等姓名按唐君碑云處士閭葵班等刻石樹頌而碑陰又有故史閭葵巴處士閭葵楚閭葵姓不見于前史而姓苑姓纂之類亦皆不載蓋前代氏族或因改易或浸微不顯遂泯沒而無傳者甚衆今世所有姓氏書類多間略不完惟時見于石刻者余每記之以裨姓氏書之闕云

漢白石神君碑

右漢白石神君碑其略云白石神君者居九山之數參三條之一兼將軍之號秉斧鉞之威體連封龍氣通北岳幽



贊天地長育萬物觸石而起膚寸而合不終朝日而澍雨  
沾洽自前後國縣屢有祈請指日刻期應時有驗猶自挹  
損不求禮秩縣界有六名山三公封龍靈山得法食去光  
和四年三公守民蓋高等始為無極山詣太常求法食相  
縣以白石神君道德灼然乃具載本末上尚書求依無極  
即蒙聽許于是遂開托舊兆改立殿堂其餘首尾尚皆完  
好可讀文多不備載其曰居九山之數參三條之一莫曉  
為何語也

漢幽州刺史朱龜碑

右漢幽州刺史朱龜碑在今亳州郡道元注水經云渦水

東逕朱龜墓北東南流冢南枕道有碑題云漢故幽州刺史朱君之碑龜字伯靈光和六年卒官今以碑考之與道元所載皆合歐陽公集古錄云龜之事跡不見史傳獨見于此碑爾余按後漢書西南夷傳熹平五年諸夷反叛執蜀郡太守雍陟遣御史中丞朱龜討之不能克太尉掾李顯建宗討伐乃以顯為益州太守發板楯蠻擊破平之常據華陽國志亦載其事與史同惟史與華陽國志皆言龜不能克而碑云蠻夷授手乞降二說不同疑碑所書非實錄也

漢朱龜碑陰

右漢朱龜碑陰文字殘缺初余讀酈道元注水經云朱龜碑陰故吏名姓多上谷代郡人知此碑有陰因託人就亳社模得之附于碑後

漢都鄉正街彈碑

右漢都鄉正街彈碑在汝州界故昆陽城中文字摩滅不可考究其歲月畧可見蓋中平二年正月而其額題都鄉正街彈碑莫知其為何碑也

漢太尉劉寬碑

右漢太尉劉寬碑寬有兩碑皆在洛陽上東門外官道傍此碑據藝文類聚乃桓麟撰後碑不知何人所為然字體

則同也

漢劉寬碑陰

右漢劉寬碑陰寬兩碑皆有陰此後碑陰也唐咸亨中碑  
仆于野其裔孫周王記室參軍爽字元爽重為建立寬以  
中平二年卒樞靈帝紀以光和七年十二月改元中平以  
曆推之是歲甲子至明年當為乙丑而爽書為甲子誤  
矣

漢尉氏令鄭君碑

右漢尉氏令鄭君碑云君字季宣聘君之孫而其名已殘  
缺其他字畫時有可識處皆斷續不成文理略可見者年

五十有七卒于中平二年而碑陰題尉氏故吏處士人名知其為尉氏令尔

漢趙相劉衡碑

右漢趙相劉衡碑云君諱衡字元宰濟南東平陵人也厥先尚矣聖漢龍興下有殘缺又云爰落異土遷于岱陰自康侯以來奕世丕承又云教海王帝之家弟不遵憲典君以特選為郎中令以先珉邪相憂即日輕舉州察茂材除修令遷張掖屬國都尉以病徵拜議郎遷東東上屬國都尉不行拜趙相在位三歲拜議郎年五十有三以中平四年二月戊午卒其四月己酉葬其餘文字完好者尚多

按後漢書敦海王名悝桓帝弟也衡墓与碑在今齊州歷城縣界中古平陵城旁余嘗親至墓下觀以碑因摸得之墓前有石獸制作甚工云

漢陳君碑

右漢陳君碑殘缺不完其略可識者云君諱度字妙高陳國相人又云武王克商封無代之後以元女大姬配胡公至厲公生公子完奔齊其後斷續不復成文而最後題中平四年九月二十日己丑立云

漢陳仲弓碑

右漢陳仲弓碑其額題云漢文範先生陳仲弓之碑文

字已漫滅蔡邕字畫見于今者絕少故雖漫滅之餘尤為可惜以校集本不同者已數字惜其不完也按邕集仲弓三碑皆邕撰其一碑云中平三年秋八月丙子卒而三碑皆云春秋八十有三後漢書仲弓傳以為中平四年八十四卒于家者疑傳誤

漢陳仲弓碑陰

右陳仲弓碑陰故吏名姓多已剝缺蔡邕小字八分惟與石經遺字爾石經字畫謹嚴而此碑陰尤放逸可愛

漢陳仲弓壇碑

右漢陳仲弓壇碑其額題故太丘長潁川陳君壇其他文

金石錄 卷一  
字摩滅不可盡識按蔡邕集有仲弓三碑以集本校之  
碑非邕撰者然字畫亦奇偉惜其殘缺不完也

漢圍令趙君碑

右漢圍令趙君碑其額題漢故圍令趙君之碑而竄後題  
初平元年十二月二十八日立碑已訛缺名字皆不可考  
所可見者有云郡仍署五官掾功曹州辟從事司徒陽公  
辟遷圍令播德二城夙曜穆清被疾去官年六十有八以  
中平五年冬十一月卒後有銘詩特完好其辭云天寔高  
惟聖同戲我君羨其縱體弘仁蹈中庸所臨歷有休功追  
景行亦難雙刊金石示萬邦其詞頗爾雅故錄之



漢周公禮殿記

右漢周公禮殿記者今成都府學有漢時所建舊屋柱皆  
正方上狹下濶此記在柱上刻之靈帝初平五年立距今  
蓋千年矣而字畫完好可讀當時石刻在者往：摩滅以  
記託于屋楹乃与金石爭壽亦異矣記有云甲午年故府  
梓潼文君增造吏舍二百餘間按華陽國志有文君字子  
奇梓潼人平帝用為益州太守不從王莽公孫述光武嘉  
之疑以記所載即其人也蓋光武建武十年歲次甲午云

漢巴郡太守樊君碑

右漢巴郡太守樊君碑云君諱敏字昇達肇祖宓戲犧遺苗

后稷為堯種樹舍潛于岐天顧亶甫乃胡昌發周室衰微  
霸侮匡弼晉為韓魏魯分為楊充曜封邑厥土河東楚漢  
之際或居于楚或集于梁君纘其緒華南西壘又云總角  
好學治嚴氏經貫穿道度無文不睹于是國君備禮招請  
濯冕題冠傑立忠蹇有夷史之直卓密之風鄉黨見歸察  
孝除郎永昌長史遷宏渠令大將軍辟光和之末京師擾  
攘雄狐綏冠履同囊投劾長驅畢志枕丘園復重察辟  
病不就再奉朝聘七辟外臺常為治中諸部從事又云季  
世不祥米巫凶熿姦校並起陷附者衆君執一心賴無污  
耻復辟司徒道隔不往牧伯劉公表授巴郡以助義都尉

養疾閭里又行褒義校尉年八十有四歲在汁洽紀驗期  
臻奄忽藏形其後有銘窮後題建安十年二月上旬造他  
漢碑類多刑缺而此碑獨首尾完好故載其大略于此所  
謂米巫凶瘡者謂張角也

漢綏民校尉熊君碑

右漢熊君碑其名字皆殘缺其額題故綏民校尉騎都尉  
桂陽曲紅灌陽長熊君之碑初余得桂陽太守周君碑陰  
據水經注以為曲江漢時本名曲紅今此碑及額亦皆作  
紅乃知酈道元為有據也

漢宗資墓天祿辟邪字

右漢天祿辟邪字在南陽宗資墓前石獸膊上歐陽公集

古錄按黨錮傳云資祖均自有傳

見章懷太子注

今後漢書有宗

均傳云南陽安衆人而無宗均傳疑黨錮傳轉寫宗為宗

爾蜀志有宗預南陽安衆人豈安衆當漢時有宗宗二族

而字与音皆相近遂至訛謬耶以說非是余按後漢書均

族子意傳云意孫俱靈帝時為司空而靈帝紀建寧四年

書太常宗俱為司空注云俱字伯儂南陽安衆人延熹二

年書司空宗俱薨又姓范載南陽安衆宗氏云後漢五官

中郎將伯子司隸校尉河內太守均族先遼東京

太守

子司隸校尉意孫司空俱元和姓纂所書亦同則均姓

為宗可無疑者當章懷太子為注及林寶撰姓纂時尚未  
差謬至後來始轉寫為宗尔余既援據詳審遂於家藏後  
漢書均列傳用此說改定云

漢司空宗俱碑

右漢司空宗俱碑云公諱俱字伯儼南陽安衆人也而其  
額題漢故司空公之碑按後漢書宗均傳均族子意  
孫俱靈帝時為司空余嘗得宗資墓前石獸膊上刻字因  
以後漢帝紀及姓苑姓纂等諸書參考以謂自均而下其  
姓皆當作宗而列傳轉寫為宗誤也後得此碑益知前言  
之不謬碑已殘缺不成文理而官秩姓名鄉里特完可考

故詳著之

漢馮使君墓闕銘

右漢馮使君墓闕銘云故尚書侍郎河南京令豫州刺史馮使君神道按後漢書馮緄傳緄父煥安帝時為幽州刺史而緄碑亦云幽州君之元子此字在宥渠緄墓前雙石闕上知其為煥闕也

漢高陽令楊君碑陰

右漢高陽令楊君碑陰歐陽公集古錄云余家集錄得楊震墓域中漢碑四震及沛相繁陽高陽令碑并得碑陰題名然得時參錯不知為何碑之陰也集古所有余盡得之

又各以碑陰附于碑後其曰懷陵園令蔣禧字武仲者沛相碑陰也其曰故吏故民故功曹史故門下佐者繁陽令碑陰也其曰右後公門生右沛君生者高陽令碑陰也

漢浚儀令衡立碑

右漢浚儀令衡立碑云君諱立字元節其先出自伊尹而其銘曰於穆從事歐陽公集古錄號為元節碑且云疑其姓伊而為從事也今碑首尚完題浚儀令衡君之碑蓋漢時石刻其官爵姓氏既載于額則其下不復更著苟文已殘缺又不見其額則遂難考究矣立與衛尉卿衡方墓皆在今鄆州中櫛方碑云其先伊尹號稱阿衡因以氏焉

漢光祿勳劉曜碑

右漢光祿勳劉曜碑集古錄云君諱曜字季尼年七十三  
其餘爵里官闕卒塋歲月皆不可見今以碑雖殘缺然尚  
有可考處蓋孝文之高又嘗為太官令即中居延都尉大宗  
正衛尉遂為光祿勳至于卒塋年月則斷續不可考矣

金石錄卷第十八

癸未十二月廿七日燈下錄畢是日雨





金石錄卷第十九

跋尾九漢

漢張戾殘碑

漢荊州從事苑君碑

漢趙相離府君碑

漢逢府君墓石柱篆文

漢永樂少府賈君闕銘

漢酸棗令劉熊碑

漢臨朐長仲君碑

漢蜀郡太守任君神道

漢蜀郡屬國都尉王君神道

金石錄 卷十九  
漢司空殘碑

漢益州太守楊宗墓闕銘

漢益州刺史蔣君巴郡太守劉君碑

漢巴郡太守張君碑

漢南陽太守秦君碑額

漢河南尹禰府君碑額

漢禹廟碑

漢禹廟碑陰

漢司空掾陳君碑陰

漢武氏石室畫像

臧伯著碑

四皓神位刻石

相府小史夏堪碑

郭先生碑

漢張戾殘碑

右漢張戾殘碑張戾者子房也碑已断裂摩滅不可次叙  
獨其額尚完題漢故張戾之碑在今彭城古留城子房廡  
中驗其字畫蓋東漢時所立樂史寰宇記陳留縣有張良  
墓引城家記云張良封陳留戾食邑小黃一萬戶漢為良  
築城因名張良城今陳留有子房廡甚盛余按西漢書

地里志注留屬陳故稱陳留宗亦有留彭城留是也子房傳曰始臣起下邳與上會留臣願封留是矣下邳與彭城相近而此碑漢人所立乃在彭城然則子房所封非陳留明矣城家記誕妄蓋不足信也

漢荊州從事苑鎮碑

右漢苑鎮碑其略云漢故荊州從事苑君諱鎮字仲弓南陽人也其先出自苑柏何為晉樂正世掌朝禮之制又云有苑子園寔能掌陰陽之理君即其胄也按姓氏書皆云苑氏出于左傳所載齊大夫苑何忌之後今此碑所謂苑柏何與子園左傳國語皆無其人故錄之以待知者

漢趙相離府君碑

右漢趙相離府君碑其前歷叙家世官爵而所述離府君事甚略云趙國相名勸孝廉成臯令趙國相又云在官五載蒞政清平有甘棠之化年四十五卒于官故吏民漢中太守邯鄲某等其名殘缺慕戀恩德刊石稱頌焉又有闕銘題漢故趙國相離府君之闕云

漢逢府君墓石柱篆文

右漢逢府君墓石柱篆文云漢故博士趙傳逢府君神道唐李利涉編古命氏北海逢氏有名絲字子繡者為漢趙王傳其孫萌不仕王莽蓋前漢時人今逢君北海人又為

趙傳疑其是也而濰州圖經北海縣有逢汾墓云汾好學  
以德義聞徵為博士趙王傳卒門人執喪經者數百葬于  
寒亭南四里今以篆文既不載其名皆莫可考然圖經所  
載逢君事首尾甚詳不知何以知其名汾必別有所據又  
疑絲与汾兩人前後皆嘗為趙王傳未可知也故并載之  
以俟知者

漢永樂少府賈君闕銘

右漢永樂少府賈君闕銘按漢書桓帝母孝崇愷皇后居  
永樂宮和平元年詔置太僕少府如長樂故事其後靈帝  
母孝仁董皇后亦居是宮歐陽集古錄引章懷太子注云

漢官儀長樂少府以宦者為之則賈君蓋亦宦者也余以漢史及石刻考之當時三公如陳球劉寬皆嘗為此官非獨一人蓋自西漢以來太后皇后官屬如大長秋之類皆參用士人然則漢官儀以為止用宦者為之蓋其闕漏而集古錄遂以賈君為宦者亦未必然也

漢酸棗令劉熊碑

右漢劉熊碑在今酸棗縣云君諱熊字孟孟下缺一字按酈道元注水經酸棗城內有漢令劉孟陽碑今據碑熊實為以縣令然則所缺一字當從水經為陽也碑又云君光武皇帝之玄孫廣陵王之孫俞鄉侯之季子也按後漢書光

武子廣陵思王荆以譴死顯宗封其子元壽為廣陵侯又  
封元壽第三人為鄉侯而李利涉編古命氏唐書宰相世  
系表皆云荆生俞卿元侯平平生彪襲封今據熊當為彪  
之弟然則于光武乃其曾孫而曰玄孫者疑碑誤

漢臨朐長仲君碑

右漢臨朐長仲君碑文字摩滅其粗可見者云君諱雄又  
云歷郡五官掾功曹史辟從事舉孝廉除郎中遷臨朐長  
而其額題故臨朐長仲君碑云

漢蜀郡太守任君神道

右漢蜀郡太守任君神道九字字畫壯偉然不著名字鄉



里歲月莫詳其為何人也

漢蜀郡屬國都尉王君神道

右漢王君神道在南陽云漢故蜀郡屬國都尉王君神道  
封陌按鄴道元注水經涓水南道側有二石樓制作精妙  
題言蜀郡太守姓王字子稚南陽西鄂人有三女無男而  
家累千金父沒常葬三女各出錢五百萬一女築墓二女  
建樓今此碑後有唐向城令張璿之撰孝女雙石樓記所  
書与水經注合惟水經誤以都尉為太守耳璿之記天寶  
七載建別錄于後

漢司空殘碑

金石錄 卷十九 五  
右漢司寇殘碑政和乙未歲得于洛陽天津橋之故基首  
尾已不完所存四十五字字畫奇偉其詞有云命尔司寇  
余回尔輔據以乃嘗為三公蓋當時顯人惜其不見名氏  
也碑陰有故吏題名百餘人尤完好筆法不減蔡邕石經  
云

漢益州太守楊宗墓闕銘

右漢楊宗墓闕銘在蜀中凡十六大字云漢故益州太守  
楊府君諱宗字德仲墓闕汶陽李長茂為蜀使者罷歸以  
此本見遺長茂名公年東州善士以畫山水者稱者

漢益州刺史薛君巴郡太守劉君碑

右漢薛君劉君碑已断裂不完惟存上一段而其額尚全  
題漢故益州刺史中山相薛君巴郡太守宗正卿成平侯  
相劉君碑古無兩人共立一碑者唯見于此爾

漢巴郡太守張君碑

右漢巴郡太守張君碑其前題巴郡太守都亭侯張府君  
功德叙云君諱訥字子郎勃海南皮人也又云炎漢龍興  
留侯維翰枝裔滋布竝極爵秩又云察孝廉除郎中尚書  
侍郎遷甘陵<sup>宛</sup>令親病去官辟司空司徒府復辟太尉  
舉高第拜侍御史揚州寇賊陸梁作難五府表君中丞督  
捕又云丙子璽書封都亭侯碑無卒英年月其後頗叙述

政績而繫以銘詩蓋巴郡太守德政碑爾按漢史自安順  
以來揚州寇賊屢熒不知張君為中丞督捕在何年也

漢南陽太守秦君碑額

右漢南陽太守秦君碑額文字已摩滅唯其額十大字尚  
完好故名字歲月皆莫可考按後漢書靈帝紀中平三年  
二月江夏兵趙慈反殺南陽太守秦頡或云此即頡碑也  
然郡道元水經注載頡墓與碑皆在宜城此碑乃在南陽  
或是郡人所立德政頌爾

漢河南尹蘇府君碑額

右漢蘇府君碑額題漢故河南尹蘇府君碑今宣州太守

張叔夜秘仲見寄云在許州道傍碑無文詞惟以十字其  
額爾按東漢時蘇氏冢顯者惟蘇章嘗以河南尹徵不就  
其他無尹河南者意其為章碑也然章扶風平陵人而碑  
乃在許昌未知果是否

### 漢禹廟碑

右漢禹廟碑字畫淺細故摩滅尤甚其事跡歲月皆不可  
考略可見者云皮氏長安定蘇而名字亦不能辨矣

### 漢禹廟碑陰

右漢禹廟碑陰自候長汾陰趙遺子宣而下凡數十人姓  
名官爵具存又有故督郵曹史縣功曹鄉部吏栢昱等人

金石錄 卷十九  
七  
名冢後有龍門復民三十五戶人名在今龍門禹廟殘碑  
之陰而集古錄云在閩鄉楊震墓側又云楊氏子孫當時  
皆葬閩鄉碑碣往三摩滅此不知為誰碑者蓋誤也

漢司寇掾陳君碑額

右漢司寇掾陳君碑額碑已殘缺不可辨唯其首八大字  
尚完字畫奇偉在潁川陳太丘墓側按後漢書太丘傳載  
二子紀湛紀為大鴻臚湛不著其為何官惟劉孝標注世  
說引海內先賢傳曰湛字季方寔少子也司寇掾公車徵  
不就發卒然則斯碑豈非陳湛碑乎

漢武氏石室畫像

右漢武氏石室畫像五卷武氏有數墓在今濟州任城墓  
前有石室四壁畫古聖賢畫像小字八分書題記姓名往  
往為贊于其上文詞古雅字畫道勁可喜故畫錄之以資  
博覽

戚伯著碑

右戚伯著碑首尾摩滅其畧可見者有云充列王室遇謫  
于呂委位捐爵而其額題周末嗣戚氏襲以興勃海君玄  
孫伯著之碑知其姓戚以文詞字畫驗之疑東漢中葉以  
前人蓋當時石刻見于今者多類此所謂充列王室遇謫  
于呂者戚夫人也

金石錄 卷十九  
四皓神位刻石

右四皓神位神昨凡刻石四在惠帝陵傍驗其字畫蓋東漢時書按顏師古匡謬正俗引圜稱陳留風俗傳自序云圜公之後圜公為秦博士避地南山漢祖聘之不就惠太子即位以圜公為司徒自圜公至稱十一世按班固述四皓但有圜公非圜公也云當秦之時避地入商洛深山則不為博士明矣又漢初不置司徒安得以圜公為之手稱之說實為鄙野余嘗疑稱著書自述其世系不應妄誕如此及得四皓刻石見其所書亦為圜公乃知稱所述果非臆說蓋當時所傳如此爾至謂圜公為秦博士及惠帝時



拜司徒者疑無所據

相府小史夏堪碑

右相府小史夏堪碑云夏堪字叔德帝禹之精苗零陵太守之根嗣也後有銘銘三字語頗古其卒葬年月殘缺字雖不工然漢碑也其曰精苗根嗣漢末人為文喜造語多類此

郭先生碑

右郭先生碑集古錄以為漢碑按後魏酈道元注水經具載此碑云碑無年號不知何代人然則歐陽公何所據遂以為漢人乎余以字畫驗之疑魏晉時人所為既無歲月



金石錄卷第二十

魏大饗碑

唐重立大饗碑附

魏孔子廟碑

魏范式碑

魏太僕荀君碑

魏南郡太守卞統碑

晉南鄉太守司馬整頌

晉南鄉郡建國碑

魏大長秋游君碑晉咸寧中建

跋尾十

魏偽漢

吳晉偽趙

游君碑陰

吳禪國山碑

吳天璽元年斷碑

晉右將鄭烈碑

晉太公碑

晉雲南太守碑

晉護羌校尉彭祈碑

晉彭祈碑陰

晉光祿勳向凱碑

晉馮臚成公重墓刻

偽漢司徒公劉雄碑

魏鄧艾碑

與下兩碑皆一時西晉立

金鄉守長薛君碑

張平子碑

趙浮圖澄造釋迦像碑

趙橫山李君神碑

趙西門豹祠殿基記

晉樂毅論

學生題名

宋武帝檄譙縱文

魏大饗碑

右魏大饗碑按魏志文帝以建安二十五年嗣位為丞相  
魏王改元延康夏六月南征秋七月甲午軍次于譙大饗  
六軍及譙父老今以碑考之乃八月辛未蓋魏志誤也是  
時丕為丞相漢獻帝猶在位雖政去王室已久然操之死  
終數月耳丕軍次舊里初無念親之心乃與群臣百姓置  
酒高會大設伎樂而臣下又相與伐石勒詞夸耀功德更  
以夏啓周成漢高祖光武為比豈不可笑也哉

唐重立魏大饗碑

附

右唐重立大饗碑大中五年亳州刺史李暨以舊文刊缺

再刻于石舊碑既斷續不可盡識而此本特完好故附其  
次俾覽者詳焉魏之事跡雖無足取而其文詞工妙亦不  
可廢也

魏孔子廟碑

右魏孔子廟碑按魏志文帝以黃初二年正月下詔以議  
郎孔羨為宗聖侯奉孔子之祀及令魯郡修起舊廟今以  
碑考之乃黃初元年又詔語時三小異亦當以碑為正

范式碑

右范式碑法書要錄云蔡邕書今以碑考之乃魏青龍三  
年立非邕書也

魏太僕荀君碑

右魏太僕荀君碑其額題魏故太僕西陽亭侯荀府君之碑碑已殘缺其可見者嘗為齊相始平太守大將軍長史封西陽亭侯遂為太僕春秋五十有一正始五年夏六月丙寅薨惟其名字鄉里摩滅不可考矣

魏南郡太守卞統碑

右南郡太守卞統碑在今曹州宛句縣所叙世次官闕甚簡又多殘缺其略云君諱統字建業又云惟帝念庸命以南邦又云嘉平元年十一月己亥寢疾卒官而其首題魏故南郡太守卞府君之表按晉書卞壺傳濟陰宛句人祖



統琅邪內史而元和姓纂亦云統為晉琅邪內史今此碑  
殘缺處猶有琅邪字尚存知其嘗為以官而統以魏嘉平  
中卒姓纂以為任晉者誤也

晉南鄉太守司馬整頌

右晉南鄉太守司馬整頌云初仕魏拜郎中中郎議郎諫  
議大夫騎都尉給事中轉拜治書侍御史咸熙二年出臨  
鄙郡加宣威將軍又云謁者就郡拜君世子執節四讓推  
與兄嗣固辭懇誠泰伯三美君又加焉又云泰始三年十  
一月使者奉詔策命君南中郎將牧就統宛都按晉史整  
事跡附見安平獻王字傳後云兄奕卒以整為世子廕南

中即將封清泉侯早卒其餘官闕皆不載據史言兄奕卒以整為世子而碑言推與兄嗣二說不同當以碑為正

晉南鄉郡建國碑

右晉南鄉郡建國碑已断裂不完其額題南鄉郡建國之碑其大略云嘉平五年漢水溢毀壞舊城又云正元二年城以其餘文字可識處大略述遷郡事而銘文有與晉常存之語知其為晉碑也按晉書地理志建安十三年魏武帝盡得荊州之地分南陽縣西畧立南鄉郡及晉武平吳太康中改南鄉為順陽而不載遷郡事此碑蓋太康以前立故仍稱南鄉也碑有云河內司馬府君者整也嘗守是

郡自有碑以碑既無建立年月因附于整碑之次焉

### 大長秋游君碑

右大長秋游君碑云君諱述字庶祖按元和姓纂云魏河南尹游述始居廣平六世孫後魏尚書明根生僕射聲今碑亦云述廣平人惟姓纂云述為河南尹以碑考之蓋未嘗為必官又按後漢百官志大長秋承秦將行官者景帝時更名大長秋或用士人中興常用官者述嘗為宛句長尚書郎左丞元城令治書侍御史南安北海安平東郡太守符節令遂為大長秋皆非官者之職然則魏制蓋亦參用士人矣

游君碑陰

嘗

右游君碑陰按王莽下令禁二名故當時士人皆以一字為名東漢時尚尔今此碑陰所記凡二百五十三人二無一人二名者碑晉咸寧中建距葬時二百年矣而士大夫猶遵葬之令不變何哉

吳禪國山碑

右吳禪國山碑其前叙孫皓即位以後郡國祥瑞凡千餘言其後云乃以君灘之歲欽若昊天月正革元郊天祭地紀號天璽又云丞相沈太尉瑒大司徒燮大司空朝等以為今象瑞畢至三表納貢九垓八埏罔不被澤率按典錄

宜先行禪禮紀勒天命遂于吳興國山之陰告祭刊石以對揚乾命廣報坤德按皓以丙申歲改元天璽碑言滂灑之歲是也皓涵虐無道人神憤疾而群臣方稱述符瑞讚頌功德蓋刻石後四年遂為晉所俘矣

### 吳天璽元年斷碑

右吳天璽元年斷碑其前云上天帝言又云帝曰大吳一萬方又云天發神讖文天璽元年七月己酉朔又云天讖廣多不解解者十二字嗚呼其言可謂妖矣據吳志天璽元年秋八月鄱陽言歷陽山石理成字凡二十明年改元大赦以協石文今此碑乃在金陵驗其文與吳志所載亦

異莫可考究孫皓在位凡八改元而六以符瑞然竟不能保其國蓋人事不修而假託神怪以矯誣天命其不終宜矣

### 晉右將軍鄭烈碑

右晉鄭烈碑云君諱烈字休林又云曾祖先生皇祖徵君顯考將作大將匠實有茂德載在國宗烈晉史無傳以碑考之嘗為文帝參佐武帝時仕為兗州刺史封東莞男以疾徵拜議郎卒于太康二年追贈右軍將軍謚曰僖侯云

### 晉太公碑

右晉太公碑其略云太公望者吳縣人大晉受命四海一  
統太康二年縣之西偏有盜葬冢而得竹筴之書書藏之  
年當秦坑儒之前八十六歲今以晉書武帝紀考之云咸  
寧五年汲郡人不準掘魏襄王家得竹簡小篆古書十餘  
萬言藏于祕府與此碑年月不同碑當時所立又荀勗校  
穆天子傳其叙亦云太康二年與碑合可以正晉史之誤  
其曰小篆書亦謬也且其書既在秦坑儒八十六歲之前  
是時安得有小篆乎碑又云其周志曰文王夢天帝服玄  
襪襪字字  
書所無以立于合旅之津帝曰昌賜汝望文王再拜稽  
首太公于後亦再拜稽首文王夢之之夜太公夢之亦然

其後文王見太公而計之曰而名為望乎荅曰唯為望文  
王曰吾如有所于見汝太公言其年月與其日且盡道其  
言臣以以得見也文王曰有之有之遂与之歸以為卿士  
而史記太公世家曰西伯將出獵卜之云云於是西伯獵  
果遇太公于渭之陽與語大說曰自吾太公望子久矣故  
號之曰太公望載與俱歸二說殊不合而王逸注楚詞亦  
載文王夢太公事與碑所書略同方逸為注時以此書未出  
逸必別有所據碑又云其紀年曰康王六年齊太公望卒  
參考年數蓋壽一百一十餘歲而史記亦不載按前所  
傳汲冢諸書獨有紀年穆天子傳師春等不載所謂周志



者不知為何書而杜預左氏傳後叙云汲冢書凡七十五卷皆藏秘府預親見之以此知不特十餘萬言史之所記蓋不能盡其亡逸見于今者絕少也太公碑汲縣令盧無忌立後題太康十年三月云

晉雲南太守碑

右晉雲南太守碑文字殘缺其姓氏名字鄉里皆不可考略可見者嘗為尚書令史察孝廉除郎中遷武陽令從龍驤將軍王濬征討遷雲南太守年五十有七卒最後題太熙元年正月上旬造太熙武帝年號也

晉護羌校尉彭祈碑

右晉彭祈碑云君諱祈字子玄隴西襄武人也其先出自  
顓頊有陸終之裔子大彭實主夏盟則其後也又云歷郡  
右職州別駕從事于時庸蜀未殄侵擾王路洮西之戰因  
敗運奇元師獲安寇厭疆虜列上功狀除舍人還參本軍  
事除涼州護軍河右未清戎寇鼎沸謀謨神略簡在帝心  
遷西郡太守至官未久復臨酒泉遠夷望風襁負歸命白  
山下令率服賓貢敦煌令狐豐距違王度涇泉之陳兵不  
血刃母弟<sup>老</sup>也辭職去官聖上仁慈聽君所求轉略陽太守  
近家祿養遂罹大艱侍喪還家服紀終始有詔以軍州始  
分河右未清材狼肆虐授君節蓋除護羌校尉統攝涼土

前後軍功應封七侯勞謙退讓陰德不伐年未知命以太  
康十年三月癸酉薨天子愍悼遣使者監護喪事榮曰君  
秉心公亮所任有方不幸殞歿朕甚痛惜故孝廉參護羌  
軍事酒泉馬朔故吏郎中蔡母番主簿郭曉良吏夏侯俊  
等追思洪烈感想哀嗟乃刊石勒銘焉西晉石刻見于今  
者絕少又多殘缺此碑文字完好可喜乃錄其終始事跡  
于以

晉彭祈碑陰

右彭祈碑陰題名者凡三百十二人有故孝廉計掾計史  
良吏廉吏計佐主簿領校錄事中部督郵西部督郵軍議

從事和戎從事記室督軍謀從事錄事史戶曹史賊曹史  
金曹史田曹史倉曹史鎧曹史兵曹史客曹史記室史節  
史車曹史水部都督中部都督功曹典事武猛從事舍人  
蜀渠都水行事中部勸農西部勸農東都水蜀渠平水門  
下賊曹門下議生錄事金曹掾兵曹掾作部史法曹史參  
戰騎督步督散督門下書佐弓馬從事監牧史戟史金曹  
典事武猛史門下通事門下小史凡一官多者十人少者  
不減數人其餘稱故吏無官號者百六十餘人當時州郡官  
屬其濫如以蓋自漢以來太守皆得自署置僚佐彭君為  
邊郡守故其所辟尤衆今盡錄其名號以見一時之制焉

晉光祿勳向凱碑

右晉向凱碑云君諱凱字士伯河內山陽人也其後歷叙  
官闕甚詳其取顯者嘗為中書侍郎尚書吏部郎給事黃  
門侍郎賜濟閩中侯廣平太守散騎常侍游擊將軍北中  
郎軍司兖州刺史中郎將後云累遷河南尹春秋六十有  
八元康九年四月甲子薨追贈光祿勳據此乃當世顯人  
而晉史無傳故其事跡莫得而考蓋君子所賴以傳者非  
爵位也願所立如何耳自古老死立壑而名稱顯著者甚  
衆雖在高位而功烈不見于當時聲跡無聞于後世者亦  
可勝數哉

晉鴻臚成公重墓刻

右晉成公重墓刻云永寧二年四月辛巳朔十五日乙未  
守鴻臚閔中侯成公重魏夫人之靈柩前世以永寧紀年  
者三漢安帝晉惠帝偽趙石祗按三國志建安二十年曹  
操始置閔中侯十七級安帝時猶未有此號而石祗永寧  
無二年然則重蓋惠帝時人也晉史有成公簡成公綏皆  
東郡白馬人

偽漢司徒劉雄碑

右偽漢劉雄碑其額題漢故使持節侍中太宰司徒公右  
部魏成獻王之碑碑云公諱雄字元英高祖之皇帝曹孝宣帝

玄孫值王莽篡竊遠遁朝為外國所推遂歸單于累葉  
相承家雲中因以為桑梓焉雄劉元海弟也晉書載記元  
海本匈奴人冒頓之後漢高祖以宗女妻冒頓約為兄弟  
故其子孫遂冒姓劉氏今此碑直云出自宣帝豈元海初  
起假此以惑衆乎碑後題嘉平五年歲在乙亥二月六日  
建按宋高公紀年通譜劉聰以晉懷帝永嘉四年即偽位  
改元光興明年改元嘉平嘉平四年改元則嘉平豈復更  
有五年蓋載記初不編年故于改元歲月難考此碑當時  
所立不應差謬乃通譜誤也

鄧艾碑

與下兩碑皆晉時立

右鄧艾碑其額題魏使持節征西將軍方城侯鄧公之碑  
碑無建立年月以詞考之蓋晉初立按魏晉史其名皆為  
艾而碑作義古艾義通為俊義茂義安之字疑艾名其  
音如艾而今人讀蕭艾之字恐非是又按艾平蜀即軍中  
拜太尉而碑但題為征西將軍者疑尋被禍未嘗受命而  
艾始封方城侯後改封鄧侯碑尚云方城侯何哉

金鄉長薛君頌

右薛君頌在今濟州金鄉縣其額題故金鄉長汝南薛君  
之頌云君諱詣字公謀其他文字皆完好驗其詞蓋縣長  
德政頌尔雖無建立年月而有吳寇未

下闕

一字耀威海隅之



語知其為晉碑也

張平子碑

右張平子碑晉南陽相夏侯湛撰識緯之說興于西漢之末而爛漫于東漢之世雖一時名儒皆從而惑焉獨平子奮然闢之甚力余嘗歎以謂如平子可謂豪傑之士不為流俗所移者今湛為此碑乃云金匱玉版之奧識契圖緯之文罔不該羅其情可謂不知平子矣

趙浮圖澄造釋迦像碑

右趙浮圖澄造釋迦像碑唐封演聞見記云內丘縣西古中丘城寺有碑後趙石勒光初五年立碑云大和上竺浮

圖澄者天竺大國附庸小國王之元子也本姓濕其碑即演所見其說皆同按晉書藝術傳澄本姓帛氏今碑作濕碑當時所立宜得其真又史作佛圖碑作浮圖二字音相近耳惟光初乃劉曜年號而以為石勒時蓋演誤也

趙橫山李君神碑

右趙橫山李君神碑題建武六年歲在庚子三月己亥二十一日癸丑按晉書成帝紀石虎以咸和九年自立為趙天王而載記云咸康元年僭稱居攝趙天王據帝紀則建武六年歲在己亥據載記則歲在庚子宋莒公紀年通譜獨以本紀為據今此碑及西門豹祠殿基記並六年建皆

云歲在庚子以汝知帝紀之失非二碑則晉紀與載記得失不復可考矣

趙西門豹祠殿基記

右趙西門豹祠殿基記云趙建武六年歲在庚子秋八月  
庚寅造西門祠殿基又云巧工司馬臣張由監作吏臣杜  
波馬孫殿中司馬臣王基殿中都尉臣潘倪侍御史騎都  
尉臣劉諡左校令臣趙升殿中校尉臣顏零等監其下刻  
物象甚多如土長強良碩章舒悽雀之類其名頗異近歲  
臨淄縣人耕地得巧工司馬印遍尋史傳皆無此官名不  
知為何代物今乃見於此碑云

晉樂毅論

高紳

右晉樂毅論石本舊藏學士家集古錄云紳死其子弟以石質錢於富人而富人家失火遂焚其石者非也元祐間余侍親官徐州時故郎官趙竦被旨開呂梁洪挈此石隨行已断裂用木為匣貯之竦尤珍惜親舊有求墨本者必手摸以道之竦歿今迹不知所在

學生題名

右學生題名歐陽公集古錄以為漢文翁學生余獨疑其非是蓋以為西漢時立則字畫不類以為東漢則東漢絕無二名者今此碑二名者凡數人又唐顏有意所書益州

學館廟堂記載漢以來石刻皆備獨無此題名使其為文  
翁學生決不肯漏落余以字畫驗之疑其為晉以後人所  
立然初無所據未敢遂以為然其後以地里書參考乃決  
知其非文翁學生也題名有幹江陽趙嵩與學從事史寧  
蜀常仲舒憲道左生遂寧董朗玄明左生晉原楊容宗長  
按晉書志江陽郡蜀劉備置寧蜀遂寧晉原並桓溫平蜀  
後置四郡東西兩漢時皆未有然則此碑為東晉以後人  
所立不疑矣

宋武帝檄譙縱文

右宋武帝檄譙縱文按顏有意書成都學館廟堂記云石

室北壁有晉義熙九年刺史朱齡石勒宋高祖檄進縱文  
其字磨滅不可備識學館記唐初三距今又數百年宜其  
磨滅愈難識矣然其歲月官爵猶略可辨云

# 金石錄卷第二十

癸未臘月四日達清谿六日往清谿還錄畢此卷  
小舟馳還字畫傾欹